

Gračanica mora obezbijediti sigurnu budućnost i trajni opstanak svog Časopisa...

Omer **BRAHIMAGIĆ**

(Odlomak iz intervjua *Radio Gračanici*, 16. 9. 2004.)

...**MISLIM** DA je "Gračanički glasnik" jedna rijetka kulturna pojava u Bosni i Hercegovini. Ako izuzmemo Časopis "Most" u Mostaru, ja ne vidim neki drugi sličan projekat na ovim našim prostorima. Tuzlaci su, čini mi se, pokušavali u dva-tri navrata da pokrenu svoj časopis, ali ne znam dokle su s tim stigli. Budući da je "Gračanički glasnik" konceptijski već jako dobro profiliran, mislim da bi ga trebalo ne samo podržati, već mu obezbijediti trajnost, da to ne bude, da kažem, nešto što je bilo pa prošlo.

Znate, često se kod nas dešava da se pojavi neka iskra, upali se ta vatra, ali se onda brzo i ugasi. "Gračanički glasnik", evo, već nekoliko godina uspješno istrajava. Ja mislim da je Gračanica kao stara bosanska čaršija u tom nekom našem značenju riječi čaršije kao jedne civilizirane kulturne sredine koja ima svoje utemeljenje u historiji i u prošlosti, na neki način iznijela i iznjedrila taj svoj "Gračanički glasnik". Zato se nadam da će baš takva Gračanica i imati snage da izdrži taj projekat na duge staze, jer bilo bi šteta da se on sam od sebe ugasi.

Ovo govorim iz razloga što znam da je čitav taj izdavački poduhvat sada u velikoj mjeri vezan za jednu ili možda dvije osobe, a to nije

rješenje za njegov trajni opstanak. Logično je, stoga, pitanje da li bi se "Gračanički glasnik" ugasio ako bi nestale te osobe koje danas, uglavnom, obavljaju najveći dio posla u njemu. Hoću da kažem da bi ga trebalo utemeljiti tako da, ako i nestane te jedne ili druge osobe, on nastavi svoj život, to jest izlaženje. Treba, dakle, obezbijediti adekvatnu zamjenu i odgovarajuće uslove da se nastavi taj složen i odgovoran posao. Dugoročno, to je zadatak osnivača, Savjeta i Redakcije Časopisa. Iskreno da kažem, više se plašim da bi zbog nedostatka adekvatne stručno-kadrovske zamjene, Časopis mogao prestati sa izlaženjem, nego zbog toga što ne bi imao razumijevanja među građanima i među nosiocima vlasti i privrede u Gračanici. Drugim riječima, Gračanica može i mora obezbijediti sigurnu budućnost i trajni opstanak svog Časopisa.

To je moja poruka.

Iako je konceptijski jako dobro zamišljen, mislim da bi ipak mogao proširiti "područje svoga interesovanja". Evo zašto: poznato je da se pod Gračanicom u različitim vremenima mijenjao prostor, pa bi bilo dobro da i "Gračanički glasnik", neovisno od toga što je danas sveden na općinu Gračanica, tematski obuhvati i taj, nekada dosta širi administrativni, pa time i kulturno-historijski prostor – župe, kotara ili sreza Gračanica.

